

# 自序

兩儀定位。陰陽肇分。天地卽以陰陽化生萬物。故經云。陰陽者。天地之道。萬物之綱紀。變化之父母。而男女其陰陽之始也。聖人以六經垂教萬世。易始乾坤。詩首關雎。書傳釐降。禮著內則。春秋載王姬。蓋以夫婦爲人道之造端。而婦人乃孕育化原之本。是以操調變之術者。不可不於婦人之病爲獨重也。自寇宗奭謂寧醫十男子。莫醫一婦人。以婦人病。四診有所不能盡。而其所患者。多隱曲不可述。如月經胎產至崩淋帶下。俱屬鄙瑣。難以言示。然而婦人之病。惟茲諸症爲最要。故著書者。於茲尤不可不亟講也。余纂輯醫學經綸。博極羣書。兼綜條貫。凡雜症得一百六十有三。採摭名賢之論。七千條有奇。而婦人月經諸症。不與焉。誠以婦人之病。莫重於月經胎產崩淋帶下。是以別立標名。曰女科經綸。凡一切內外虛實寒熱。各有條序。按之略方名。詳治論。俾學者知所從事。其於婦人病。庶毋患治療之倍難於男子也。司馬子長稱扁鵲過趙。聞邯鄲貴婦人病帶下。卽爲帶下醫。夫婦人病。不止於帶下。而扁鵲所過。隨以其名聞諸侯間。知古人留心於婦人病。蓋

慎且重也。今之醫者。非如扁鵲遇長桑君。授上池神術。舍昔聖昔賢之論。而欲冀爲洞垣之見。不其難哉。苟有志斯。其以是編爲規矩焉。繩墨焉可也。康熙甲子歲孟秋七月。樵李棘人蕭壩廣六氏漫識。

# 女科經綸目錄

## 卷一

月經門

一四七

## 卷二

嗣育門

一三二

## 卷三

胎前證上

一三三

## 卷四

胎前證下

一三八

## 卷五

產後證上

一四九

## 卷六

產後證下

一四五

卷七

崩帶門

一一二三

帶下門

一一三九

卷八

熱入血室證

一一九

血分水分證

九一一三

咽中證

一四一一五

癥瘕痞癖證

一五一二三

乳症

二三一二九

前陰諸症

二九一三九

夜夢鬼交

四〇一四一

# 女科經綸

清 樵李 蕭 堦 廣六纂著

## 卷一

### 月經門

經論女子月事屬太衝脈盛。  
素問曰。女子七歲。腎氣盛。齒更髮長。二七而天癸至。任脈通。太衝脈盛。月事以時而下。故能有子。

經論女子血海屬於少陰一經

靈樞曰。衝脈起於胞中。出於氣街。前行於胸。伏行於背。上出頰頰。滲灌諸陽。下入於足。注諸路。爲十二經脈之海。其出入皆少陰經以行。故爲血海。

經論女子經水溫寒與天地相應

素問曰。天地溫和。則經水安靜。天寒地凍。則經水凝泣。天暑地熱。則經水沸溢。卒風暴起。則經水波湧而隴起。邪之式於脈也。寒則血凝泣。天暑則氣淖澤。虛邪因而入客。亦如經水之得風也。

慎齋按。已上經論三條。序女子月事。始本太衝脈盛。而衝脈則起胞中。卽爲血海。此經水之原也。但經水得寒則凝。得熱則行。嘗與天地寒暑之氣相應。而調經者。可以知所務矣。

女子月事本血室以時而下論

王太僕曰。衝爲血海。諸經朝會。男子則運而行之。女子則停而止之。謂之血室。經云。任脈通。衝脈盛。男既運行。女既停止。運行者。無積而不滿。動也。停止者。有積而能滿。靜也。不滿者。陽也。氣也。能滿者。陰也。血也。故滿者。以時而溢。謂之信。男子以氣運。故陽氣應日而一舉。女子以血滿。故陰血應月而一下。

女子月經本任衝二脈血海有餘論

馬玄臺曰。任衝二脈。奇經八脈之二也。經云。任主胞胎。衝爲血海。今二脈俱通。月事而下。靈樞云。衝脈任脈。皆起於胞中。又云。衝脈爲血之海。又云。血海有餘。按血

海之海。雖曰既行而空。至七日後而漸滿。如月之盈虧相似。當知血海之有餘。以十二經皆然。非特血海之滿也。故始得以行耳。

女子月事本任督二脈血海之滿論

程扶生曰。任脈者。起於中極之下。以上毛際。循腹裏。上關元。至咽喉。屬陰脈之海。任者。妊也。此人生養之始。故曰任脈。中極之下。長強之上。此奇經之一脈也。督脈者。起於下極之腧。並於脊裏。上至風府。入腦上顛。循額。至鼻柱。屬陽脈之海。督之言都也。是人陽脈之都綱也。人脈比於水。故云陽之海。此奇經之一脈也。任脈主任一身之陰血。太衝屬陽明。爲血之海。故穀氣盛則血海滿。而月事以時下也。

婦人月水本於四經論

齊仲甫曰。婦人月水。本於四經。二者衝任。二者手太陽小腸。手少陰心。然衝爲血海。任主胞胎。二者相資。故令有子。小腸經屬腑。主表爲陽。少陰經爲臟。主裏屬陰。此二經在上爲乳汁。在下爲月水。

慎齋按。已上四條。序女子月經本於血室。血室卽血海。而其脈則屬於衝任督三脈。心與小腸二經。爲月水之原也。

女子天癸之至各月信論

陳良甫曰。經云。女子二七而天癸至。天謂天真之氣。癸謂壬癸之水。壬爲陽水。癸爲陰水。女子陰類。衝爲血海。任主胞胎。二脈流通。經血漸盈。應時而下。天真氣降。故曰天癸。常以三旬一見。以像月盈則虧。不失其期。故名曰月信。

女子月經非天癸之辨論

馬玄臺曰。經云。女子二七天癸至。天癸者。陰精也。腎屬水。癸亦屬水。由先天之氣畜極而生。故謂陰精爲天癸。王冰以月事爲天癸者。非也。男女之精。皆可以天癸稱。今王註以女子之天癸爲血。則男子之天癸亦爲血耶。男女當交媾之時。各有精。而行經之際。方有其血。未聞交媾時。可以血言也。至云精開裏血。血開裏精者。亦非。靈樞云。兩神相搏。合而成形。常先身生。是謂精者是也。但女子之精。以二七而至。而其月事。亦與此時同其候也。

慎齋按。已上二條。序女子之月水。卽爲天癸。又辨天癸不可以月信名也。

男女精血本五味之秀實論

褚侍中曰。飲食五味。養髓骨肌膚毛髮。男子爲陽。陽中必有陰。陰中之數八。故一

入而陽精升。二入而陽精溢。女子爲陰。陰中必有陽。陽中之數七。故一七而陰血升。二七而陰血溢。皆飲食五味之實秀也。

婦人經血屬心脾所統論

薛立齋曰。經云。飲食入胃。游溢精氣。上輸於脾。脾氣散精。上歸於肺。通調水道。下輸膀胱。水精四布。五經並行。東垣所謂脾爲生化之源。心統諸經之血。誠哉是言也。心脾平和。則經候如常。苟或七情內傷。六淫外侵。飲食失節。起居不時。脾胃虛損。心火妄動。則月經不調矣。大抵血生於脾土。故云脾統血。凡血病當用苦甘之藥。以助陽氣而生陰血也。

婦人經血生於水穀之精氣論

薛立齋曰。血者水穀之精氣也。和調五臟。洒陳六腑。在男子則化爲精。在婦人則上爲乳汁。下爲月水。故雖心主血。肝藏血。亦皆統攝於脾。補脾和胃。血自生矣。凡經行之際。禁用苦寒辛散之藥。飲食亦然。

婦人月水與乳俱脾胃所生論

程若水曰。婦人經水與乳。俱由脾胃所生。經脈別論云。食氣入胃。其清純津液之

氣歸於心。入於脈。變赤而爲血。血有餘。則注於衝任而爲經水。經水者。陰水也。陰必從陽。故其色赤。稟火之色也。衝爲血海。任主胞胎。若男子媾精。陰陽和合而成孕。則其血皆移蔭於胎矣。胎既產。則胃中清純津液之氣。歸於肺。朝於脈。流入乳房。變白爲乳。是稟肺金之色也。或兒不自哺。則陽明之竅不通。其胃中津液。仍歸於脈。變赤而復爲月水矣。

慎齋按。已上四條。序婦人經血。由於飲食五味。水穀之精氣所化。此調經必先於扶脾保胃爲要也。

女子經不調由合之非時論

褚侍中曰。女人天癸既至。踰十年無男子合。則不調。未踰十年。思男子合。亦不調。不調則舊血不出。新血誤行。或漬而入骨。或變而爲腫。或雖合而難子。合多則瀝枯虛人。產乳衆則血枯殺人。觀其精血。思過半矣。

經不調由陰陽盛衰所致論

王子亨曰。經者常候也。謂候其一身之陰陽愆伏。知其安危。故每月一至。太過不及。皆爲不調。陽太過則先期而至。陰不及則後時而來。其有乍多乍少。斷絕不行。

崩漏不止。皆由陰陽盛衰所致。

經候不調有陰陽相勝論

許叔微曰。婦人病。多是月經乍多乍少。或前或後。時發疼痛。醫者一例呼爲經病。不辨陰勝陽。陽勝陰。所以服藥少效。蓋陰氣乘陽。則胞寒氣冷。血不運行。經所謂天寒地凍。水凝成冰。故令乍少。而在月後。若陽氣乘陰。則血流散溢。經所謂天暑地熱。經水沸騰。故令乍多。而在月前。當別其陰陽。調其血氣。使不相乖。以平爲期也。

經不調屬風冷乘虛客胞中論

陳良甫曰。婦人月水不調。由風冷乘虛。客於胞中。傷衝任之脈。以損手太陽手少陰之經也。蓋衝任之脈。起於胞中。人將息順理。則血氣調和。六淫不能爲害。若勞傷血氣。則風冷乘之。脾胃一傷。飲食漸少。榮衛日衰。肌膚黃瘦。皆由衝任勞損。故凡遇經行。最宜謹慎。否則與產後證相類。

月水不調屬風冷之邪搏血論

王子亨曰。婦人月水不調者。由勞傷氣血。致體虛。風冷之氣乘之也。衝任之脈。皆

起於胞內。爲經絡之海。手太陽小腸。手少陰心。二經爲表裏。主上爲乳汁。下爲月水。若冷熱調和。則衝任氣盛。太陽少陰所生之血。宜流依時而下。若寒溫乖適。經脈則虛。如有風冷。虛則乘之。邪搏於血。或寒或溫。寒則血結。溫則血消。故月水乍多乍少。爲不調也。

月經不調屬憂思鬱怒所致論

方約之曰。婦人以血爲海。婦人從於人。凡事不得專行。每多憂思念怒。鬱氣居多。書云。氣行則血行。氣止則血止。憂思過度則氣結。氣結則血亦結。又云。氣順則血順。氣逆則血逆。忿怒過度則氣逆。氣逆則血亦逆。氣血結逆於臟腑經絡。而經於是乎不調矣。

慎齋按。已上六條。序婦人經水不調之由也。婦人以血用事。故病莫先於調經。而經之所以不調者。或本於合非其時。或屬於陰陽相勝。或感於風冷外邪。或傷於憂思鬱怒。皆足以致經候不調之故。此病機之不可不察者也。

經水不調有先後多少之分

戴復庵曰。婦人每月經水應期而下。不使有餘。猶太陰之缺。其有或先或後。或多

或少。或欲來先病。或遇來而斷續。皆謂之不調。和氣飲加香附。

經行先期後期有血熱血虛之分

朱丹溪曰。經水先期而至者。血熱也。四物加芩連香附。後期而至者。血虛也。芎歸參朮加二陳。

薛立齋曰。先期而至。有因脾經血燥。宜加味逍遙散。有因肝經鬱滯。宜歸脾湯。有因肝經怒火。宜加味小柴胡湯。有因血分有熱。宜加味四物湯。有因勞役火動。宜補中湯。如過期而至。有因脾經血虛。宜人參養榮湯。有因肝經血少。宜六味丸。蓋血生於脾。故云脾統血。凡血病當用甘苦之劑。以助陽氣而生血也。

月經過期不及期爲有火無火論

趙養葵曰。經水如不及期而來者。有火也。宜以六味丸滋水。則火自平矣。如不及期而來多者。本方加海螵蛸柴胡白芍。如半月或十日而來。且綿延不止。此屬氣虛。用補中湯。如過期而來者。火衰也。本方加艾葉。如遲而色淡者。本方加桂。此其大略也。其間亦有不及期而無火者。有過期而有火者。多寡不同。不可拘於一定。當察脈之遲數。視稟之虛實強弱。但以滋水爲主。隨證加減。凡紫與黑色者。多屬

火旺之甚。亦有虛寒而紫黑者。不可不察脈審證。若淡白。則無火明矣。

月經紫黑屬熱非寒論

朱丹溪曰。經水者。陰血也。陰必從陽。故其色紅。稟火色。血爲之配。氣熱則熱。氣寒則寒。氣滯則滯。爲氣之配。因氣而行。見有成塊者。氣之凝也。將行而痛者。氣之滯也。來後作痛者。氣血俱虛也。錯經妄行者。氣之亂也。色淡者。虛而有水混之也。紫者。氣之熱也。黑者。熱甚也。今人見紫黑成塊。作痛。率指爲風冷。乘之用溫熱劑。禍不旋踵。經云。亢則害。承迺制。熱甚必兼水化。故熱則紫。甚則黑也。且婦人性多忿鬱。嗜慾倍加。臟腑厥陽之火。無日不有。非熱而何。若以風冷。必須外感。卽或有之。亦千百而一二也。

經黑屬風寒外乘當辨脈證

葉氏曰。血黑屬熱。丹溪之論善矣。然有風寒外乘者。十中嘗見一二。蓋寒主收引。小腹必常冷痛。經行時。或手足厥冷。脣青面白。尺遲或微而虛。或大而無力。熱則尺洪數。或實有力。參之脈證爲的。準繩曰。冷證外邪初感。入經必痛。或不痛者。久則鬱而變熱。且血寒則凝。旣行而

紫黑故非寒也。

經水辨色有氣虛血熱痰多之分

朱丹溪曰經水不調而水色淡白者氣虛也。宜參朮歸芍黃耆香附之屬。經水過期而紫黑成塊者血熱而實也。必作痛。宜四物加黃連香附。經水過多而淡色者痰多也。二陳加芎歸。

薛立齋曰經水過期而至。有因脾經血虛者。宜人參養榮湯。有因肝經血少者。宜六味丸。有因氣虛血弱者。宜八珍湯。

經水辨色用藥之法

李氏曰心主血。故以色紅爲正。雖不對期而色正者易調。其色紫者風也。四物加荆防白芷黑者熱甚也。四物加芩連香附。淡白者虛也。有挾痰停水以混之。芎歸湯加參耆白芍香附。有痰者二陳加芎歸。如煙塵水。如屋漏水者。二陳加秦艽防風蒼朮如豆汁者。四物加芩連。或帶黃混濁者。溼痰也。成塊作片白不變者。氣滯也。四物加香附胡索枳殼陳皮。色變紫黑者血熱也。

慎齋按已上七條序經水有先期過期之候有屬熱屬寒之分。有色黑色淡之。

辨凡此皆經候不調之所屬也。

經論月水來腹痛屬子門有寒

甲乙經曰女子胞中痕子門有寒引骸髀水道主之。

經行腹痛屬風冷客於胞絡

陳良甫曰經來腹痛由風冷客於胞絡衝任。或傷手太陽手少陰二經。用溫經湯。加桂枝桃仁。若憂思氣鬱而血滯。用桂枝桃仁湯。地黃通經丸。若血結成塊。用萬病丸。

經行腹痛屬寒濕搏於衝任

滑伯仁曰有經行前臍腹絞痛如刺。寒熱交作。下如黑豆汁。兩尺沉澀。餘皆弦急。此由下焦寒濕之邪搏於衝任。衝爲血海。任主胞胎。爲婦人之血室。經事來。邪與血爭。故作疔痛。寒濕生濁。下如豆汁。宜治下焦。以辛散苦溫血藥治之。

經行腹痛屬於血澀

王海藏曰經事欲行。臍腹絞痛者。血澀也。宜入物湯。加木香檳榔胡索苦楝。經行腹痛屬於氣滯

朱丹溪曰。經將行腹痛。屬氣之滯。用香附青皮桃仁胡索黃連。又用抑氣散。四物加胡索丹皮條芩。又曰。經將來。腹中陣痛。乍作乍止者。血熱氣實也。四物加黃連丹皮。

經行腹痛宜調氣

戴元禮曰。經事來而腹痛。不來腹亦痛。皆血之不調故也。欲調其血。先調其氣。四物加香附吳茱。或和氣飲加吳茱。痛甚者加玄胡索湯。

經行體痛屬於血氣不足

產寶百問曰。經水者。行氣血。通陰陽。以榮於身者也。氣血盛。陰陽和。則形體通。或外虧衛氣之充養。內乏榮血之灌漑。血氣不足。故經候欲行。而身體先痛也。趁痛散主之。

經水過後腹痛屬於氣血兩虛

朱丹溪曰。經水過後作痛。是氣血俱虛也。宜八珍湯。亦有虛中有熱。經後亦作痛。宜逍遙散。亦有經行過後。腹中綿綿走痛者。是血行而氣滯。未盡行也。四物加木香。